

Mientras cu na Aruba tambe tin bosnan lantando pa dolarisacion:

Otro siman Sint Maarten ta anuncia si e tambe ta dolarisa

PHILIPSBURG/ORANJESTAD.- Pa otro siman por spera un anuncio oficial di Sint Maarten riba dolarisacion entrante prome di januari 2012. Presidente di Banco Central di Antia Emsley Tromp a anuncia, cu e lo ta na Sint Maarten otro siman pa tuma nota di e posicion oficial di e isla. Ya ta basicamente sigur cu e isla lo pasa pa uza dollar como su moneda oficial mescos cu anteriormente tabata e caso cu islanan BES cu a dolarisa entrante



prome di januari di e aña aki. E presion pa dolarisa na Sint Maarten cu de factor ya caba tin un economia dolarisa, dia pa dia ta birando mas grandi. Den e gremionan mas halto di gobierno i politica en general na Sint Maarten, ya caba ta biba e pensamiento cu mester haci economia di e isla oficialmente na dollar. Siman pasa e corant mas importante di Sint Maarten, The Daily Herald tambe a expresa su mes na fabor di dolarisacion di e isla i a pidi pa no perde mas energia, fondo (di preparacion pa e moneda no bo) i recurso humano na e trayecto aki.

Aruba

E discusion si mester dolarisa economia di Aruba poco poco ta lantando cabez, despues cu introduccion di dollar como moneda na Boneiro, Saba y Sint Eustatius a bay na un manera mucho mas efectivo di loke a pensa prome. Tambe e echo cu na Sint Maarten casi tur sector ta di acuerdo pa dolarisa economia di e isla, ta pone cu na Aruba tambe tin bosnan ta lantando si esaki mester tuma lugar, si of no. Echo ta keda cu economia di Aruba ta drei pa mas cu 75% riba dollar, considerando e impacto grandi cu e sector turistico tin riba economia di Aruba. Banda di esei tin hopi hende ta kere cu mantencion di un propio moneda den e parti aki di reino, mientras ku dos-tercera parti di

reino tin un moneda cu no ta florin, al fin al cabo lo conduci mandatarionan di Aruba pa nan tambe pensa den direcccion di dolarisacion di economia Arubiano.

Corsou

Na Corsou tambe ta surgiendo e pregunta kico lo bay pasa cu florin Antiano/Curasoleño. T'asina cu como parti di e acuerdo pa desmantela Antia, Corsou i Sint Maarten a yega na un palabracion, cu lo bin cu un moneda combina hunto na 2012. E moneda lo a haña e nomber “florin Caribense”. Awor cu Sint Maarten cu tur probabilidad lo ki afo, e pregunta ta, si Corsou lo mantene e punto di bista of lo dolarisa. Tin indicacion cu diferente miembro importante di gobierno ta na fabor di dolarisacion. Den sector priva, principalmente sector bancario tin duda si esey ta un bon idea. Presidente di Banco Central Emsley Tromp mes ta na fabor pa dolarisa, algo cu el a expresa na diferente ocasion.

Un decision riba dolarisacion ta importante, pasobra na cuminsamento di e aña aki, mester caba cu e diseño i tambe despues duna instruccion pa cuminsa traha monedanan pa e florin Caribense. Si e florin Caribense no ta bay sigui, ta importante pa sa esey for di awor aki, di manera cu por spaar fondo i energia na Corsou tambe.